

vnd klugen Leuthen / vmb das allerfürnehmste / nötigste  
vnd wichtigste Stück / aller Handel vnd Gewerbe auff  
Erden / als vmb das liebe Bergwerck / so wenig ange-  
nommen haben.

Vnd dieweil doch je vnd allewege / Goldt / Silber  
vnd Geldt / die ganze Welt regiert hat / vnd noch. Vnd  
das auch ehliche vortreffliche Leuthe / mit ihrer Geschick-  
tigkeit in andern Sachen / ihre Kunst reichlich bewiesen /  
die Rechtthandel / Ordnung / Gebrauch / vnd das ganze  
Wesen des Bergwercks vnd der Metall / Davon den  
Käysern / Königen / Fürsten / Herren / Landen vnd Leu-  
ten / am allermeisten gelegen ist : So gar in Vergessen  
vnd in Verachtung gestellet haben. Vnd sich / wie die Bü-  
cher der Rechten anzeigen / viel vmb geringere Sachen /  
hefftig bekümmert vnd angenommen haben.

### Käyser Otto / vnd König Weni- ceslaus.

Es hat wol der grosse Käyser Otto / der Erste / vnter  
welchen das Bergwerck zu Goslar in Sachsen / vnd das  
zu Freyberg in Meissen / gefunden / vnd auffkommen sol-  
len seyn / etliche Ordnung vnd Berg Rechte stellen lassen.

Ich finde aber von derselbigen Zeit an / bis auff die  
nechst vergangenen 200. Jahr / gar wenig grosser Herren  
oder Regenten / denen es ein Ernst gewesen were / die zer-  
fallenen Bergwerck / mit guten Ordnungen vnd Berg-  
Rechten / wiederumb auffzuricht / Ausgeschlossen / den  
Durchlauchtigsten / Großmächtigsten Fürsten vñ Herrn /  
Herrn Wenceslaum den Sechsten / König zu Böhemb /  
welcher nach tödlichem Abgang / seines geliebten Herrn  
Vaters Ottakers / da er das Regiment zu Böhemb / ge-  
meinen Nutz / vnd die Bergwerck daselbst / alles zerstöret /  
vnd in grossen Abfall kommen / oder gefunden : Hat er  
von Stund an / im Eingang seines Regiments vnd Kö-  
nigreichs / welches im Jahr nach Christi / vnsers lieben  
Herrn Geburt / 1280. geschehen / zu wieder auffrichtung  
der Bergwerck / als der nötigsten Stück eins / in einem  
Land oder Königreich / die beschriebene Berg Recht vnd  
Ordnung / mit Hülffe / Raht vnd Bedencken / verständi-  
ger Bergleut / vnd der Gelehrten in Rechten / in Lateini-  
scher Sprach beschrieben / vnd verfassen lassen : Dar-  
durch dann / neben der Gnade vnd Segen Gottes / das  
Bergwerck auff den Ruttenberg / dazumal wiederumb in  
ein treffentlich Auffnehmen kommen ist / Wie man noch  
heuti